

MOTTEKNE SPØRSMÅL

1. Aud Karin Oen, SV, hadde sendt inn slikt spørsmål:

«Etterlyser svar om nynorsk språkbruk frå oktobertinget

Etterlyser svar på oversendingsforslag om nynorsk språkbruk i frå oktobertinget 2017. Eg veit at svaret skal koma til fylkestinget, men det har no gått to fylkesting sidan dette vart fremja og eg etterlyser status.»

Det var utarbeidd slikt svar:

«Fylkesrådmannen seier seg lei for at saka ikkje er følgd opp tidlegare.

Fylkestinget 7. mars 2017 behandla saka «Retningslinjer for namnsetjing – vidaregåande skular i Hordaland» (PS 24/2017). Fylkestinget gjorde slikt vedtak:

«Vidaregåande skular i Hordaland skal i hovudsak gjevast namn etter lokale stadnamn.»

Eg ser på denne saka som ei prinsippsak for namnsetjing av vidaregåande skular i Hordaland.

I saka er det ikkje nemnt noko om målform på skulenamn. Like sidan Hordaland og Bergen vart slått saman til eitt fylke i 1972 har det vore vanleg at vidaregåande skular i Bergen, har heitt skole/videregående skole. Unnataka var namna på skulane i tidlegare Arna kommune og Stend jordbruksskule.

Då namnet på Stend jordbruksskule skulle endrast i samband med at skulen fekk fleire studieretningar, vart det vedteke at nynorskforma Stend vidaregåande skule skulle nyttast. (Fylkesutvalet 22.11.2006.) Ved vedtak i fylkestinget 3.10.2017 vart det vedteke at den samanslåtte skulen i Arna framleis skal ha nynorsk namn, og samanslåinga av Tertnes vgs. og delar av U. Pihl vgs. får nynorskforma Tertnes vidaregåande skule.

Vedtak om målform i fylkeskommunen

Fylkestinget vedtok 1. oktober 1976 nynorsk som administrasjonsmål i Hordaland fylkeskommune. Vedtaket vart stadfesta i samband med reglementsendingar vedtekne av fylkestinget 16. juni 1981.

Reglementa for fylkesting, fylkesutval og personalreglement har vore fornya fleire gonger sidan 1981. I dei gjeldande reglementa (revidert fylkestinget 13.12.2016 – PS 114/2016), er vedtaket om målbruken i fylkeskommunen stadfesta i reglementet for sakshandsaming punkt 1:

«1. Målform

Innkallingar, saklister, saksførelegg og møtebøker skal vera på nynorsk.»

I personalreglementet heiter det:

«20. Administrasjonsmål

Administrasjonsmålet i Hordaland fylkeskommune er nynorsk. Etter lov om målbruk i offentleg teneste har publikum likevel krav på å få svar på den målforma dei sjølv nyttar.»

Reglementet seier ikkje noko direkte om kva målform som skal nyttast i informasjon og marknadsføring. Standard praksis er at nynorsk skal nyttast i tråd med vedtaket om administrasjonsmål.

I 2010 vart spørsmålet om målbruk ved marknadsføring av kollektivtrafikken i Bergen teke opp i samband med at Bybanen vart sett i drift.

Fylkesutvalet behandla i møte 20. mai 2010 saka «Målform ved marknadsføring av kollektivtrafikken i Hordaland, sak 103/10. Utvalet slutta seg til retningslinene som fylkesrådmannen føreslo i saka, og dette vart formidla slik i brev til Skyss – datert 3. juni 2010:

«SAMANDRAG

Fylkesrådmannen trekkjer i denne saka opp retningsliner for målform ved marknadsføring av kollektivtrafikktilbodet i fylket. Hovudregelen er at nynorsk skal nyttast. For lokale kollektivtilbod i ein kommune/eller delar av ein kommune, kan målforma som kommunen har valt nyttast. I Hordaland har 30 kommunar valt nynorsk som målform og tre er nøytrale (Askøy, Bergen, Odda). I Bergen vil Skyss såleis kunna nytta bokmål i marknadsføringa av Bybanen og busstilbod internt i kommunen.»

Oppsummert

Administrasjonsmålet for Skyss er nynorsk.

I marknadsføringa (annonsar, brosjyrar, rutehefte m.m.) skal Skyss som hovudregel nytta nynorsk.

For lokale kollektivtilbod i ein kommune/delar av ein kommune, kan Skyss nytta målforma kommunen har vedteke.

For Bybanen i Bergen kan Skyss nytta bokmål.

Nettsidene www.skyss.no skal vera på nynorsk, men kan også ha parallell informasjon på bokmål.»

Språkarbeid framover

Fylkestinget vedtok 7. mars 2017 målbruksplan for Hordaland fylkeskommunen. I administrasjonen vert det arbeid med å setja i verk planen der målet er at me skal kommunisera på godt og variert språk både på nynorsk eller bokmål. Mellom anna har me deltakarar på KS sine «Klart språk-kurs» med sikte på gjennomføring av arbeid med klart språk internt i fylkeskommunen.

Fylkesrådmannen vil også visa til at det i den vedtekne intensjonsplanen for den nye Vestland fylkeskommune, er slått fast at administrasjonsmålet for den nye regioneininga skal vera nynorsk.»

2. Aud Karin Oen, SV, hadde sendt inn slikt spørsmål:

«Overskridingar på utbetringa av strekket Deildo

Det er svært store overskridingar på utbetringa av strekket Deildo. Kan fylkesordføraren gjere greie for dette? https://www.nrk.no/hordaland/vegvesenet-med-betongtabbe_-bestilte-1100-kubikkmeter_-behovet-var-elleve-gonger-storre-1.13979923.»

Det var utarbeidd slikt svar:

«Rassikringsprosjektet i Deildo ligg på riksveg 13. Det vedkjem soleis ikkje Hordaland fylkeskommune sin økonomi eller ansvarsområde. Statens Vegvesen kan gjere greie for prosjektet for fylkesutvalet ved eit seinare høve, når sluttprognosen er sikrare.»

3. Aud Karin Oen, SV, hadde sendt inn slikt spørsmål:

«Midlar til auka ruteproduksjonen i vest

Syner til vedtak i budsjettet om midlar til auka ruteproduksjonen i vest. Det er eit uttrykkjeleg ønske frå kommunane i vest om få direkteruter gjennom Knappentunellen og eit samrøystes vedtak i fylkesutvalet i november 2017. Det skal leggjast om store endringar i trafikkmonsteret frå måndag 16. april for å sjå om ein kan minske køen. Det vert opplyst at det ikkje kjem igong med auka ruteproduksjon og direkteruter i media. Kva er årsaka til dette når det ligg pengar i budsjettet og ein veit kor presserande situasjonen er mot vest?»

Det var utarbeidd slikt svar:

«I budsjettvedtaket for 2018 ligg det 1,5 mill. kroner til «Auka ruteproduksjon kollektivtilbod region Vest» som eitt av fleire kollektivtiltak. Finansieringskjelde for dei ulike kollektivtiltaka er ekstra belønningssmidlar 10 mill. kr og auka billettinntekter med 9 mill. kr. Ekstra belønningssmidlar er avgjerande for å i verksetje tiltak i tråd med budsjettvedtaket.

Ramma for belønningssmidlar frå staten for 2018 er auka med 100 mill. kr, og alle dei ni byområda som er omfatta av belønningssordninga, bymiljøavtalar og byvekstavtalar kan få midlar frå denne potten til tiltak som betrar kollektivtilbodet. Midlane skal fordelast til nye belønningssavtalar og til nye/reforhandla byvekstavtalar. Fordelinga av midlane skal vere eit resultat av forhandlingar om byvekstavtale eller søknad om ny belønningssavtale, og det er ikkje lagt opp til ein separat søknadssprosess som tidlegare.

For Hordaland vil det vere eit resultat av reforhandling av inneverande byvekstavtale som vil avgjere storleiken på eventuelle ekstra belønningssmidlar. Desse forhandlingane vil truleg gå ut over hausten, og gjer at ein ikkje kan planlegge styrking av ruteproduksjonen i inneverande år.

Fylkesrådmannen er i løpande kontakt med Fjell kommune i samband med pågåande prosessar for å betre trafikksituasjonen i området.»

4. Aud Karin Oen, SV, hadde sendt inn slikt spørsmål:

«Søknaden til vidaregåande skule

Søknaden til vidaregåande skule. Kunne fylkesutvalet fått ei kort orientering om korleis ståa er i dei ulike regionane.»

Det var utarbeidd slikt svar:

«Søknaden til dei vidaregåande skulane, skuleåret 2018/19

Generelt:

Totalt søkjartal (alle søkjargrupper) 2018 (2017)	18995 (18634)
Auke i søkjartalet samanlikna med 2017:	301
Søkjartalet er no på same nivå som i 2016	
Tal søkjarar med Ungdomsrett 2018 (2017)	17310 (17075)
Auke i søkjartalet med Ungdomsrett samanlikna med 2017:	235

I 2018 er det 103 færre avgangselevar frå 10.klasse enn i 2017. Likevel har søkjartalet frå dei som har denne retten auka med 235. Hovudgrunnen til dette er at den femårige fristen for å ta ut Ungdomsretten no er oppheva, og har fått tilbakeverande kraft. Ungdomsretten må no takast ut før det kalenderåret ein fyller 25 år. Det er også gjort endringar i reglane for omval av utdanningsprogram som også fører til at fleire får Ungdomsrett over lenger tid. Denne elevgruppa vil nok bli større dei næraste åra.

Kort kommentar til søkjartala i regionane (i tillegg til tala nedanfor kjem søkjarar til tilrettelagte grupper og innføringsklassar som i statistikken ikkje kjem med under den einskilde region).

Sunnhordland : 1591 plassar 1387 søkjarar med Ungdomsrett

Denne regionen gir tilbod om dei fleste utdanningsprogramma. Mellom kommunane Fitjar-Stord-Bømlo er det ein del søkjarar som søker seg på tvers av kommunegrensene Næringslivet, og særleg industrien i regionen, treng no arbeidskraft som særleg byggjer på utdanningsprogrammet Teknikk og industriell produksjon. Søkjartalet til dette programmet er framleis lågt, samanlikna med tidlegare år. Det er positivt at det no ser ut til at det vil vere søkjargrunnlag til Vg2 Industrietechnologi på Rubbestadnes vgs. Søkjartalet til dette programområdet skulle ein likevel ynskt hadde vore større ut frå industrien sitt behov i regionen

Odda/Kvinnherad 718 plassar 621 søkjarar med Ungdomsrett.

Odda vidaregåande skule har stort sett berre søkjarar frå kommunane Odda, Ullensvang og Jondal.

Ved denne typen skular er årgangskullet frå 10. klasse avgjerande for søkjartalet til skulen. I år har det kome litt fleire søkjarar til Studieførebuande utdanningsprogram etter at det i fjor, etter ein sterk kampanje for yrkesfag, var på grensa til at dei studieførebuande utdanningsprogramma måtte leggjast ned. Dette skjer ofte ved skular som berre har søkjargrunnlag frå eigen region. Tilbudsstrukturen ved Odda vidaregåande skule vil, truleg med unntak av Vg1 Bygg- og anleggsteknikk, kunne oppretthaldast uforandra frå i fjor.

Kvinnherad vidaregåande skule har også stort sett berre søkjarar frå eigen kommune. Søkjartalet til dei ulike utdanningsprogramma er godt tilpassa tilbudsstrukturen, men også her skulle ein ynskt fleire søkjarar til teknikk og industriell produksjon. Ikkje minst i høve til den positive utvikla ved Norsk Hydro sitt anlegg på Husnes som har signalisert at dei treng fleire lærlingar framover.

Voss/Hardanger 988 plassar 953 søkjarar med Ungdomsrett

Skulane på Voss har eit godt søkjargrunnlag til dei fleste av utdanningsprogramma.

Ved Kvam vidaregåande skule er bilete noko meir utfordrande, særleg ved tidlegare Norheimsund vidaregåande skule som har dei yrkesfaglege tilboda i regionen. Særleg kan det sjå ut som skulen mister ein del søkjarar etter Vg1 fordi programtilboda på Vg2 er smalt på grunn av låge elevtal.

Os/Fusa 956 plassar 1072 søkjarar med Ungdomsrett

Dei fleste utdanningstilboda har eit godt søkjargrunnlag. I Fusa er det no særleg gode søkjartal innanfor Naturbruk (blå modell). Skulane har relativt få søkjarar frå Bergensregionen, og dekkjer difor i hovudsak dei kommunane der skulane ligg, pluss Tysnes og deler av Samnanger og Kvinnherad (Hatlestrand-området)

Bergensregionen

10391 plassar 11568 søkjarar med Ungdomsrett

I denne regionen får ein søkjarar også frå andre regionar i Hordaland, men totalt sett er talet lite frå andre område enn dei nærliggjande kommunane til Bergen. Merk at «Bergensregionen» også omfattar Sotra og Askøy, mens Nordhordland er definert som eigen region i vigo-systemet.

Dei aller fleste utdanningsprogramma har på dette tidspunktet fleire søkjarar enn det er plassar, men ein del av søkjarane til studieførebuande program vil nok trekkje søknaden fordi dei får plass ved private skular i regionen. Også i denne regionen skulle ein gjerne sett eit breiare søkjargrunnlag til tilboda innanfor Teknikk og industriell produksjon, men også i år vil det diverre måtte leggjast ned klassar innanfor Industriteknologi—sjølv hovudfaget innanfor verkstadindustrien.

Nordhordland

989 plassar 1256 søkjarar med

Ungdomsrett

Skulane i denne regionen har svært ulike søkjartal. Knarvik vgs. har gode søkjartal til dei aller fleste av utdanningsprogramma, og har gledeleg nok i år ein auke att innanfor Teknikk og industriell produksjon.

Austrheim vgs. slit meir med søkjartala sine, ikkje minst fordi det er svært små årskull i Gulen og Solund.

Elles er det slik at ein del søkjarar frå nordre del av Åsane søkjer seg til Knarvik vgs.

Osterøy vidaregåande skule har i hovudsak søkjarar frå eigen kommune, og har eit godt søkjargrunnlag til dei fleste utdanningstilboda som skulen har.»

OPEN TIME

Silja Ekeland Bjørkly, H, ba om å få status på utviklinga og prosessen i samband med regionreformen.

Anne Gine Hestetun, A, opplyste at ho er styremedlem i BKK, og stilte spørsmål om ho var inhabil.

Fylkesordføraren gjekk frå og fylkesvararordførar Pål Kårbø, KrF leidde møtet medan spørsmålet om Hestetun var inhabil vart drøfta.

Geir Kjell Andersland, A, sette fram slikt forslag:

«Ved drøftelser vedrørende punkt 7 i intensjonsavtalen mellom Hordaland og Sogn og Fjordane er Hordalands fylkesordfører erkjent inhabil.

Fylkesutvalet konstaterer at det i dag ikkje foreligger et godt nok beslutningsgrunnlag til å endre denne status. Fylkesutvalget ber fylkesrådmannen snarest fremme ny sak om fylkesordførers inhabilitet/habilitet.»

Roald Kvamme, A, sette fram slikt forslag:

«Anne Gine Hestetun er habil.»

Røysting

Kvamme sitt forslag vart vedteke med 7 røyster (med fylkesordføraren si røyst) mot 7 røyster (V, H, Frp, MDG) for Andersland sitt forslag.

Hestetun tiltredde saksbehandlinga.

Silja Ekeland Bjørkly, H, hadde innspel til fylkesordførar angående arbeidsvilkåra til opposisjonen. Fylkesordførar svarte.

Fylkesordførar orienterte om at Bybanen AS skal utvide sitt styre med to medlemar. Fylkesordførar føreslo ei valnemnd med Roald Kvamme, A, Pål Kårbø, KrF, og Silja Ekeland Bjørkly, H, til å koma med forslag på personar slik at fylkesutvalet kan velje kandidatar i tid før generalforsamlinga. Fylkesutvalet slutta seg til dette.

Benthe Bondhus, Sp, oppmoda om at følgjande vert teke med i arbeidet med rehabiliteringa av fylkesbygget:

«Med referanse til det planlagte arbeidet for renovasjon/ombygging av fylkesbygget har eg eit spørsmål.

Kan det planleggjast å leggja tilrette for naudsynt areal til utleige for dei ulike politiske fylkeslaga i forbindelse med dette arbeidet?

Dei ulike fylkespartia leiger kontor/møteareal på ulike adresser i Bergen kommune i dag. Om dette let seg gjera ber ein om ein spørreunde til dei ulike fylkespartia.»